

# Siixu Umoru Fuutanken Xiisa

nan giri Hanme Daraame

Moodibugu, Muritaane



*L'Histoire d'El Hajj Oumar Tall de Fouta  
selon la tradition orale soninké  
Racontée par Hamé Dramé  
de Modibougou, Mauritanie*



# Siixu Umoru Fuutanken Xiisa

nan giri Hanme Daraame

Moodibugu, Muritaane

*L'Histoire d'El Hajj Oumar Tall de Fouta  
selon la tradition orale soninké,  
racontée par Hamé Dramé  
de Modibougou, Mauritanie*



**SIL Mali**

**Equipe de Traduction en Soninké**

Site Web : [www.asawan.org](http://www.asawan.org)

E-mail : [ets.asawan@gmail.com](mailto:ets.asawan@gmail.com)

Orthographe du soninké au Mali

Illustration : International Illustrations, The Art of Reading  
3.0, © SIL International, 2009

Deuxième édition, révisée, 400 exemplaires  
Septembre 2014

© SIL Mali, 2014, première édition 2004

B.P. 2232, Bamako, République du Mali

Tous droits de traduction, de reproduction et d'adaptation réservés pour tous pays. Toutes les contestations relatives à l'application des dispositions de la présente ordonnance, fixant le régime de la propriété littéraire et artistique (N° 77 –46 CMLN, du 12 juillet 1977) seront portées devant les tribunaux civils, sans préjudice du droit pour la partie lésée de se pourvoir devant la juridiction répressive dans les termes du droit commun.

---

## *Roraqe*

Alla ma fo toxo seren da bire a ga da haqilen sugandi a danja. Kuudo seren n'i lenki dunan ja du da xunbane kaanataaxaade yi, a nan siri an n'an daarun tu. Ken moxo saanan ya ni, duna xannun muurunden fedden (SIL) ga d'a ganniya na jaarun moodi, Hanme Daraame terinka. Baawo Sooninkara danben do a naamen tangandaanon ga ni Sooninkara jaxamalanun ya, aken n'o maaba ti masalan lamaanu yi bakka tuwaaxu be sawunten g'a maxa Sooninkara da. Ke kitaabe kuja, axa wa riini Siixu Umoru Fuutanken bire moxon tu. A ga da debu beenu do soro beenu gaja gelli a gille Fuuta yi ma diinan ga namene a maxa Maasina yi, o wa kun xa xaranga ke kitaabe noxo. Na dunarakutiyen ga ji moxo be yi gannin xase tu.

Ke kitaabe noxo, m'o ga da yugusire gollinjankitten faamu t'a maxankuton ja, ken ni Birante renme Karunga ya yi.

O na Hanme Daraame nawaari, nawaarinde be xenpa ga nt'a yi. A ti, Sooninkon ti : « Saado sere ga si tuunu, m'an ga fare tuunu, an n'an yinme tu fina. » Ayiwa aken d'i yinme tu, na du tuyindi tanan ja, na tanan xa tuyindi. Daraame ke, an do kuufande !

Xa soro beenu ga deemandi na ke kitaabe bangandi ti SIL jamariyen ja, kun ni Muusa Dalla Saranbunu ado Manmodu Sita Saranbunu ya yi, Xuusaane Gidimaxa.

---

## *Siixu Umoru Fuutanken Xiisa*

### **Fuuta do Maasina**

Siixu Umoru ga giri Fuuta nan ri Woyitaala raqen raga, a ga ri fanjen ɗa, a da fuuragumun tirindi nan ti i na ko baane da yere ? I ti i na Ali ya da. A ti i n'i karandi. I ti i ra nt'a yi i ga m'a ko Ali da. I daga a ko Ali da. A d'i tirindi ti : « A gollen ni manne yi ? » I ti : « Moodin ya ni, gubunlenmen do kitaaben w'a maxa, mutagga xullen fanamanten wa yinmen ɗa. » A ti : « I nan maxa a karandi. Woyitaala taaxe moodi ma ro debe ke di. A ga Alla toxon ya koono, nke do a nta toɗono debe yi axa maxa fanjen kutu t'a yi. »

Bito sikki i wa fanjen falle, dullen digi i ya, Baafin Danbele giri, a sigi. A ti Siixu da : « Siixu ! » Siixu ti : « N naamu. » A ti : « O bita manime ni ke yi fanjen falle? » Siixu ti : « Bito sikki. » A ti : « Allantoxon w'an maxa, an ra wa tannaxate wuro jaana an ga ma yige. Alla neeman wa yanqana katt'an ɗa. Oku kuttu ku beenu ga yere, komon ya ni o yi, o do hoo-ro, gawulonu, kolijajonu, suballu ado toorodonu. »

« Oku ga ji Fuuta, o na kollangan ya soxono, o na mangajen ro a yi, a na siro, a nda moyi o n'a fata, o yaqun n'a ja futon ɗa o n'a yiga. An n'a faayi toxo ke be Alla ga d'a xalifa an ɗa, gelli a ga d'a boosi an ɗa o na saage dagana gelli sere ga m'oku teenun soxo Fuuta. Yaala sere ra wa gilli Fuuta nan daga hiji kinbakkann ɗa ta jeru, an na

Alla jaaga a na jahadun kini an ɗa, jingundon ga nt'an maxa ? Ken ra nta jaana. An ma daliilu koyi o yi. »

Yaxanbaane ke da « arakannu » filli salli. Jonbangan wa a maxa, safayinlenmu karagi w'a yi. A giri nan sigi. A da Woyitaala fanje ke sanpa ta sikko. Mutagga xulle ke be fanamanten g'a yinkollan ɗa, a d'a bagu a yi n'a raga ti kanpen ɗa. A d'a kanpa baanen sedi, a daga saxu tagayen xoodon ɗa. A ti : « Tajiri mayo. »

Wujunu ku tanmi do fillon taaxuranun sikki, tanjikken do wujunun tunmi xaraben tere mutagga xulle ke ya kanma na fanjen kutu. Mutagga ma safi. I da Woyitaala tagayen raga. I ga da tagayen raga, gawulonun xaaru, koliyajanun xaaru.

Sallifanan ga wa kinene a wa taaxunu misiiden di. A ja debigumen ɗa Woyitaala, a ja alimaamin ɗa Woyitaala. A da deben su raga. Wuron ga ro, a taaxu, a da “ salaatulifaatiyan ” raga.

Ali saxunten wa xuben di. Ken koota tanjere yaxanbaane w'a yonkin tangana. I nda raqen soxo nan bagu, Siixu Umoru Fuutanken wa Alla jaagana, samaqen wa roono Ali maxa xuben di, yinmu tanmi do fillo w'a yi. A ga na xuben tetten su faayi, a w'a jiini samaqen yinmen wa no. A na giri. A nda garabasu nan sigi baane, a na toxo xaarunu. Tanjere ke yaxanbaanen diranten na ri. I ga na xuben raqen wuji, i n'a tirindi. A na ti konpen yan fagu i maxa samaqen ɗa. I na yinben kumu, i nta samaqe walla. I na ti : « Ali saxu ! Fo wo fo ra nta yanqana nan ri ro

katt'anken ɲa konpen di, n'oku toxo yere. » Tanjeren yaxanbaanen na saage.

A nda saxu texen ɲa baane, Siixu Umoru Fuutanken na Alla ɲaaga. Alla na gide yanqandi, ke be gan xanta Ali ka ke tagayen ɲa. Gide ke siitinten na halliyaaxatabaanen ya. A na toxo dindana a yinmen di. Ali na garabasu, a na toxo xaarunu. Tanjeren yaxanbaanen na ri i n'a tirindi.

Duna ga d'i tu bagu a yi, a ti : « Axa da killen wara de ! N ga ke be walla, axa m'a wari. » Tanjere ke yaxanbaanen da killen wara a kaane. A ma xirixe ro i sin ɲa. A ri fanɲen ɲa a ma Somono tirindi fuure yi. A dangi, a ri Seegu Kura.

Seegu tunkanyugon d'a tirindi. A ti : « Bisimilla, manni na do an ɲa ? » A ti : « Kure. » A ti : « Taaxu, an nda ri a ga m'ike kari, anken nta warini. » A ti : « Yaala Alla ya n'an maxa yere ba ? » A ti : « Ayi. » Iyo, a ti ke be ga do ike batten ɲa, Alla w'a maxa. Baawo a d'a koyi ike yinme ya wuri, i d'a wari. Anken ra nta katta ken da. I wara i nan dangi.

A dangi, a ri Sunsanɲumadenba. A d'a tunkanyugon tirindi nan daga yanqa a yi. A da Ali bisimilla. I kira taaxunu. Lellen ga kije, a t'a da : « Yugo, saado in ga wa wuyini yere, n n'an tirindi, yaala Alla tana w'an maxa yere ba ? » A ti : « Ayi. » « Iyo, » a ti ke be ga do ike batten ɲa, Alla w'a maxa. Baawo a d'a koyi ike yinme ya yi wuri i d'a wari. « Killen kini in ɲa in nan dangi. »

Yaxanbaane ke dangi. A ri ware Jaafarabe. Siixu Umoru Fuutanken da Woyitaala yokken bagandi, a da Seegu



yokken bagandi, a ri Sunsannumadenba yokken bagandi.  
A d'a batu m'i ga riini Jaafarabe.

Ali dangi, ken kootan ɗa debe nta Mowuti. A da killen wutu m'a ga wa riini Saarehamudallayi. Ken kootan ɗa Siixu Amadu Hamallabbo ya na no. Tandume wujune si yugo w'a maxa gurugo ke di. Gaawalle be g'i maxa kanbo tanmi do fillo ya n'a yi.

Maasinankon na ti “ *yahataaki arataaki* ”. I ga n'a sooti an ɗa n'a buxuti, a w'a jiini i da goron kanbu na siran mini, n'i kafu me yi i raqen ɗa a xumen fakkan wa sirajin do gorojin ɗa. I nda gaawallen fuutu bakka yugo be tinkanben ɗa, i na tahadaren boosi n'a kini an ɗa i na ti « “ *jakku haako sukka hen* ” ».

Siixu ri yanqa Jaafarabe. Wujunu ku tanmi do fillon taaxuranun sikki, a ti i nan yanqa fanɗen ɗa, i nan yanqi. I beesu yanqi. A ti i na sallijin katu. Beesu da sallijin katu. A ti i na “ arakannu ” filli salli. Beesu da “ arakannu ” filli salli. A ti : « I beesun saxu i kitti tayen kanma, an n'an yinmun koyi fankitten ɗa, an n'an jon koyi kinbakkan ɗa, an nan wuyi xenqene. Yillen ga na kare, an ga na kuyi ke be yi, an na ri a ko. »

Jaman wuyi xenqene. Yillen ga kare. I ga na fo be tirindi, ken na ti ike kuyi i ga yitten ya kanma. I ga na fo be tirindi, ken na ti ike kuyi i ga da jibe raga. I nda fo be tirindi, ken na ti ike kuyi i ga da dafe raga. I nda fo be tirindi ken na ti ike kuyi i ga fanɗen noxon ɗa.

Tijaani Amadu Tijaani ga da wulluhan salli, a ga yige nan duguta, beeteyen ga kiɗe bire be, i d'a tirindi. A ti :

« Nke ga kuyi ke be yi Baaba, “ *ne tiidi* ” (a xoten ya ni). »  
A ti : « I kuyi, sere be ra ga wa dagana faaren ɗa  
Hamudallayi, an ga deben walla, ma sallijin ga na ɗi an  
maxa bito sikki. I da diinan soron xiri n’i tirindi, a ma  
kite. »

I da Baafin Danbele xiri, i d’a tirindi. A ti : « Bito sikki  
salliji ? » I ti : « Yabo. » A ti : Siixu ! A ga na wari ike maxa  
axa w’i kaana. A nta xawa warini ike maxa xa. Ike giri  
Jaafarabe kaanun ya, an gan d’i tirindi nan ti yille kareye ko  
n d’i kitten saxu wandi yaqen tinkanben ɗa, an wa sere  
kitana. Nxa salliji bito sikki, ike kille feti ken ɗa. Ike ni  
komen ya, i wa diinan di, tanjikke yidanqare botonten w’i  
maxa. Kame sogonen wuno w’i ya. I wa diina ke di, yugo be  
ga na yaada axa n’i xiri i n’a katu. Ike haaju feti salliji bito  
sikki. Ike do an ga nta me kanma yinme i nt’i teɗen roono  
ɗiijen ɗa.

Tijaani ga toxo taaxunu, a ti : « Baaba. » A ti :  
« N naamu. » A ti ike Tijaani Amadu Tijaani sallijin n’i maxa  
arijuma do arijuma ya yi. « Baawo xenqon w’a bonondini in  
nta xenqene, na wandi yaqen faayi ta sikko a w’a bonondini  
in nta ken ɗaana, nan soyi a w’a bonondini in nta ken  
ɗaana, ta duuru terenden w’a bonondini in nta ken ɗaana,  
digan kabanta kongen w’a bonondini in nta ken ɗaana,  
yiganden ga nt’in raqen di kanbadosaaden ya n’a yi. »

Yaxanbaane ke taaxu jeyidaane kanma. Si yaxaren ya  
ni, a wuyin wa xaaxu tanmi do baane, mexen w’a yi, a ma  
renme saara abada. A toxo dagana m’a ga riini  
Saarehamudallayi kanfallun ɗa. Tijaani jigijippi ya. A d’i

doronmen ja n'a safa tageyen ja « asalamu aleyikum. » Amadu taaxunten ga jaman noxon ja, a xa da kuupinden saagandi.

Tijaani ri sigi jaman ja, a ma sere kuupi. Amadu ti Maasinankon n'a kuupi. I ti i nt'a kuupini, baawo mukken ya ni, a ri a ma sere kuupi. Amadu ti a kuupindi, a ga tageyen falle ike d'a jumi. Jama, axa d'a kuupi. I ti i nt'a kuupini. A ti Tijaani da : « Bisimilla. »

Tijaani ti : « I ga ri ke be jamu ya ni. O da kennen ya xata n'a girindi Woyitaala, o ken tanpinten ya ni, gelli a ga yere an n'a kini in ja. » Amadu ti : « A wa yere, xa Alla xoten ni, xalifa xoten ni. Daga an na kitaaben faayi, Alla ga da xalifan xotondi moxo be. N'a raga n'a kini axa yi, Alla kille fe. N ra nt'a yi. Axa g'a mulla an salli ya, in n'a sallindi. Axa ga w'a mulla in n'a kari, n n'a kari. Nxa, n ra nt'a kinni axa yi. Baawo a ri xaliife ya. » Tijaani ti : « Iyo ! An ga na kennen xata, a ga na ro xooran di, an ga na konto a kitta an na manne jaana ? » Amadu ti : « An na yinben ya roono a yi. » Tijaani ti : « Iyo, an n'an kiilun toxo ken di. » Amadu ti : « Yinben na mani biyini ? » Tijaani ti : « Sokki kaawante. » Amadu ti : « An n'an kiilun toxo ken ja. Saarehamudallayi ni “ hudo keccon ya hubbataaki. ” »

Yaxanbaane ke saage. A ga ri Jaafarabe, a ga ti : « Baaba. » Faaben ti : « Gore, kuuru an ga da fo wo fo ko, n d'a mugu. Taalu. » Faaben taaxu, a da “ salaatulfatiyan ” raga. Wuron di, Alla da “ wuruhaanun ” yanqindi katt'a yi. Saarehamudallayi gundon na yellen ya di, yelinen ya ni, a ga wa kinen noxon ja. Kinen wa jin noxon ja Hamudallayi

tagayen xoodon ɗa. M'i ga na kinen raga, n'a noxon booxo, na yellen kara, yeliɗe ke na kanpi. I ga ma ken ya kita falle, i ra nta katta Hamudallayi da. Wujunu ku tanmi do fillon xarabe taaxuranun sikki, tanjikke a do wujunu tunmi xarabe. A d'i xiri. A d'i tirindi a ma sere kita Baafin Danbele ga fe.

Yaxanbaane ke da killen wutu. A ga riini jin raqen ɗa Saarehamudallayi, kame yaxanbaane wa taaxunu, Maasinankon ya ni. Yahataakin w'i maxa (arataaki). Kun wa dagana taaxu na wulluhan sellen dugu. Kinen ga na bagu jin di, a wa saqa. Wulluhan ga na dangi, kiyen ga tawo, a wa yanqana jin di. Maasinankon na daga kaanun di. Koota su suxuba i wa dagana a tanga a ga wucce ke be jaana sellan ɗa.

Baafin Danbele ri kamen yaxanbaanen ɗa taaxunu. Kinen wa saqa. A d'i tirindi. I ti : « Ke ni Siixu Amadu kinen ya. A wa jin di, a nda bagu saado wulluhan sellen ga sallini. Kame yaxanbaane ya n'oku yi. O w'a tangana. A nda ro jin di, o wa saagene dagana kaanun di. An xa ri manne yi ? » A ti i ri do ke kine ya. Ike ni Siixu Umoru Fuutanke komen ya, i roye diinan di a do lenki naxa, o da tanjikke do debu neri ya yokken bagandi. A ga d'i wara do fo wo fo, i do ken wa dagana. Xa n'axa moxon sironi. I wa kinen deɗene Jaafaraabe.

I ti : « An toxo ? » A ti : « Segikolonogomeera Muusabaafi Cakkito. » Maasinankon kori ke digaame telonondini.

A tiigi kinen ɗa, a do a garabasu nan sigi. A d'a saxu i kunken ɗa. A d'i kittiteyen do yidanxaren wutu, na kame ke yaxanbaanen katu n'i saxundi. Baafin do kinen daga. Yaagun maxa, Maasinankon da du wara jin ɗa, i ti i ra nta dagana a ko Hamudallayi nan ti yugu baane da Maasina kame yaxanbaane katu. I ra nta dagana.

A do kinen ri Jaafarabe. I d'a saxundi n'a noxon booxo, na yellen bagandi n'a kara, waalu-waalun kanpi. Gidimaxankon na ti "jenjeerinxulle". A daga sigi dibalinɗen ɗa Saarehamudallayi, niijen toxo Sarallene.

Amadu ti Maasinankon da : « Axa wa ke yeliɗe tu ba ? »  
I ti : « "A/a." » A ti : « Ke ni in yeliɗe be ga kinen noxo di jin di ya. Siixu kome Baafin yan da kine ke raga, a do a ga daga. » I wa yaxanbaanu tanmi do fillo muurunu, i g'i xayini Kuntankon ɗa. I kisima yan da tannaxate siine ɗa xiliwan ɗa batti baanen ɗa, a ga wa Alla ɗaagana.

A da yaxanbaanu tanmi do fillo taaxundi siyigun kanma. A ga wa digaame be koono, a d'a safa bataaxen ɗa. I do a nan daga i n'a kini Kuntankon ɗa.

I da koroosen saxundi na "alifaatiyan" wutu. Siixu samaɗen d'i yinkollon bagandi, tanmu do fillo. Kuntankon d'i kutu. I ti : « Xa daga, xa n'a ko Amadu da, a do Siixu nan gaja. Samaɗe be ga w'a maxa niijen wure yinmu tanmi do fillo ga w'a yi, o d'i kutu. »

Siixu Umoru Fuutanken ken do kuren dangi. A ri Saarehamudallayi raɗen raga laxasara. A d'a ɗi tandume ke wujunen doppi yugon su bagu, nan daga fuxu gunnen di. Fuutankon toxo bunan katta ma kiyen ga wa xenne. I ri

tagayen ɗa, i da xirixun wasa. I da siinun yetu, i da futuron sallijin katu. I ga wa sallini, arakan baane, fillandi Siixu Amadu bagu xurayen ɗa. A ti tandumen wujunen na bunan katu Fuutankon ɗa tagayen ɗa. Bunan toxo sefene. Mexen wa yanqana xoyi jin moxo.

Baafin Danbele da “ salaamu aleyikumu ” ɗa sallen siginte. A da yidanxaron wutu, a d’i siiti i xoodon ɗa. A da dunqanɗun ro i feqen wure, a d’a katu. A ti : « Fo wo fo ga ni kome, a na salamaleyikumun ɗa. » A ti Siixu da : « Gore ! Duna ra nta ɗaana salamaleyikumu Allahu akibaaru. Daliilu be ga w’an maxa, an na Alla ɗaaga, kiyen nan bagu kinbakkan ɗa. »

Elimaane Sire Sanba Denba Haluwaara, a da Alla ɗaaga, kiyen bagu kinbakkan ɗa. A ti Fuutankon da : « *Habbe, ngabbe, jalten* (Xa da xirixun siiti, axa n setu, xa ri o n bagu). » I da killen wutu. Fuutankon wa terene kiyen ɗa, Maasinankon wa bunan katta wuron ɗa, m’i ga wa riini Maanumaanu xurayen ɗa. I yanqa na xirixun bagu i siinun ɗa. I taaxu.

Ken falle, Siixu da yaxanbaane wara Koomaxan Maagasa, Jiifon Tunkara ni Jiifo Laamini, a taaxunten wa Jibaxangillen kanma. « Yaala do kanfallun ɗa, an ga na dala wari noqu be, an n’a ko o da. » A toxo yaalana a do Jibaxangille ke m’a ga wa riini Maasina kame yaxanbaane saxunten ɗa jin raqen ɗa. A d’i kuupi. A ti : « Axa giri minna ? » I ti : « O giri Saarehamudallayi. » A ti : « Axakun ri manne yi yere ? » I ti : « Siixu Amadu yan ti o nan ri ke ji tanga, Fuutankon nan maxa a mini. Baawo a na Maasina

niijnen ya. An xa ni ko yi ? » A ti ike ya ni Koomaxan Magasa yi. I ro Siixu diinan di Kagorota ya, n'a wara yere, a ga da kame yugo wari noqu su, a w'i koyini i ya, i baane w'i ragana. Axa n'axa moxon sirondi. Sumalle ke be ga w'i maxa, i w'a fakka. Alla ga na duje, Siixu wa sallijin ragana t'a yi lenki.

Yaxanbaane ke yanqa. A da sumallen tunnindi jin di m'a ga wa fakka, a d'a fanama gerebuusin ja. A d'i tayen tan ro alikeebun di. Noogen ga kijene kanmun ja bire be, i da kame ke kattan tukka a yi. A d'i degeren ja na mexen ferefetu bakka xirixen di, a taaxu.

A daga jin kini Siixu yi, a saage riini katta Maasina kamen yaxanbaanen ja. A d'i buxuti, m'a ga w'i rondini Saarehamudallayi. Yillen ga kare, Siixu Amadu da yaxanbaane taaxu si yugon kanma, nan ti a n daga a ko Siixu Umoru Fuutanken da, a na xura a da Maasina niije, ike ya fo ni. Xunbane yillen ga na kare, n'a wutu Hamudallayi, nan daga a taaxu Simaaye, badage su ga wa gunnen di, i wa wujunu tanmi donbi yugo sigindini a wure. A nta kirana Maasina niijnen di. A na xura a da nan ti Alla ya fo ni kanmu, ike Amadu ya fo ni niijnen ja (*Alla jeyi kanmu, miino Amadu jeyi leyidi*).

Iyo ! Wuron ga na ro gunnen di, yugun ga na taaxu, batunun ga na taxandi baane, yugu beenu ga wa sere karini, an na kun niini sarallene ya. I nuxunen jin ga bakka nan tolli. An ga wa ku beenu niini saqa nan xenqe m'i ga xiirindi, yillen ga na kare kun kalla ya. Ken biren ja poyi baane yan timiini. Karadigijanbanun wa gingonmo. I wa Alla

naagana yillen ga na kare seren nan kara. I na yaaxanfuccen kita n'a toni. Turunun wa gingonmo, tuunun wa gingonmo.

I wuyi battun ɗa, poyi yan wuyi tinmi. Yillen ga wa karene, Siixu Amadu Hanmallabbo, badage su ga Maasina kanfallun ɗa, a da wujunu tanmi donpi yugo sigindi a wure. Tuwaanana ya ni, xason do saanen taagumansen w'a gijimen ɗa. Kuren ga na janbandi baane, turunun w'i batta.

I toxo dagana m'i ga wa riini Maanumaanu xurayen ɗa. Maasinankon daga sigi. I da gaawallen ɗorondi kanmun di. A nan xuranta xaaɓin ɗa. A soome ke ra wa saasen bagandini. Kanbo tanmi do fillo w'a yi. A xaren ni mexen ya, a funsen ni mexen ya. Baane su taaxunten wa si yugo kanma, siran do goron w'an kanbantigin ɗa. Xaasan wunon do a doroken w'an ɗa. Fuutankon toxo taaxunu.

Yaxanbaane wa no a koota, a kanu. A ti Siixu da : « Siixu ! » Siixu ti : « N naamu. » A ti : « Oku riye yere, a ga nan fuɗu koye yi, jaaxa suumanten ya faayi ke, dullen ga jaana xoyi i n'o kari. » A ti : « Ken ni kan ɗa ? » A ti : « An yaaxen ga wa ke be yi, suumanten ya ni. » A ti : « An yaaxen wa ke yi ba? Ke su ni Maasina gaawallen ya, i ga d'a soomen ɗorondi kanmun di. », « Eh ! Ayiwa, » a ti : « ku ga n'a ja Maasinankon ya, oku do ku ra nta gajana. » Siixu ti : « An yinmen wutu, an na kanmun faayi. Tagefoonu be ga Alla maxa, i ya nan xooro ke gaawalle yi. »

A d'i yinmen wutu, a da kanmun faayi. Ken biren ɗa, Alla da malikiyan yanqandi, a su do kanpa xooɗe. Kanmun raɗen ɗa Alla d'a wuji Siixu Umoru Fuutanken da. N'a wutu



kanfata fanan ɗa n'a wara kanfata jirundin ɗa, malikiya su ga ji gajana jahadun kuren di, a su dinda. A ga da kanmun faayi, a ga ti : « Eh ! » Diinan kira gajana ma futuron ga wa kijene, kanbo ma kije me yi, raqen booxe. Siixu ti : « Xa da ke wutu bakka diinan di. Ayiwa, n ma sere su jaamari, an ga Fuuta jaman ya di, an ga w'an yinmen wuttu na kanmun faayi, o do kiyen ga wa xenne. Xa maxa kanu ku yi. Xa tawuhiidi t'Alla tunkaaxun do a dorontaaxun ɗa. Nke Siixu Umoru Fuutanken da Alla jaaga ya, jahadun wutiran do a jamera, yonki su ga na toxo inke diinan ya, an yaaxon wupini Arijana ya. Xa tawuhiidi t'Alla tunkaaxun do a dorontaaxun ɗa, axa nan gaja. N na kaafirinun ya tuubindini. »

Banfin Danbele tere, a ri sigi a yinmen di. A ti : « Elimane Sire Sanba Denba Alimuxutaari, Muxutaari Sire Sanba Denba Alimuxutaari, N'gaari Hamudallayi, N'gaari Woyitaala, N'gaari Dingiraye, N'gaari Kunakaari, N'gaari Yelimaane, N'gaari Nooro Mango, N'gaari Makka Madiina, Afo Duniya, Afo Laakara. N w'an jaagana in ga da ke be ja diina ke di, taqe be ga w'in maxa Laahara, an na Alla jaaga an n'a koyi in ɗa saasa gelli in ga ma kara. »

Siixu ti a na gubullenmen wutu. A d'a wutu. A ti : « An wa dalan noqu tu ba ? » Baafin ti i w'a tu. A ti : « Daga a faga jin ɗa, an do a n ri. An ga na ke be wari, an ga na ri an n'a ko. »

Baafin daga. A ga wa riini dalan ɗa, a da ji a kaawa. Sokkinxayen bagu a batten ɗa. A da hoooro yaxaru filli ji taaxunu, i nan faranfara, i faton xawun ya ni, i

yaaxanfunsun faranfaron ni, finayunsikki do xurayunsikki w'i ya. A d'i kuuni ta sikko. I m'a jumi. « Eh ! », a ti, « sariyan d'axa raga. Hari wandi yaqen ya, sere ga n'a kuuni ta sikko, a daga a n'an jumi. A du ma daga yugo na yaxare kuuni mene. Nke ga d'axa kuuni, mukun ga n'axa yi ya ni. » I ti : « Maxa o tanpindi ti digaame yi de ! Oku ra nta sefene wandi yugo da. Alla m'o jaamari. O kiina toxon ya ni Baafin Danbele. A ga Siixu Umoru Fuutanken diinan di. A wa kalla lenki, n'oku ni Arijannan goorun ja. Oku n'a kande foonun ya, o ga ri wanqindi. O ra nta sefene an da baawo o nt'an tu. »

Yaxanbaane ke saage riini, a ti Siixu da : « Siixu ! N daga. » A ti : « An da manne wari ? » A ti : « N ga da ke be wari, saado in ga w'a koono an da, n w'an tirindini. Diinan ja, n'a wutu yere nan daga a wara Fuuta, ko do ko toxon ni Baafi ? » A ti : « An baane ya ni. » A ti : « N da hoooro yaxaru filli ya wari, i ga t'i kiina toxon ya ni Baafi. A wa do Siixu Umoru Fuutanken ja. A wa kalla lenki. » A ti : « An ya ni. An ga da ku beenu wari, ike ya nda Alla jaaga na kun koyi an ja. Taqen be ga w'an maxa no, Alla ya n'a haqen tu. »

A da muxutuuminu ku tanmi do fillon bagandi n'i saxundi. Kame ke sogonen wunon w'a yi, a nt'a toganini. A da tanjikke ke yidanxaren wasa n'a saxundi. Labu baanen w'a maxa. A d'i kitten wutu Amadu komen da, Yaranga Taamura. I toxo regene katta me yi, nan ri sigi. Baafin t'a da : « Anken ni ko baane yi ? » A ti, ike ya ni Yaranga Taamura yi. I na do Siixu Amadu Hanmallabo ya yi. Gelli i

ga saare koota be a do lenki naxa, a yinme ga wa ke be yigana, i na ken ya yigana. Yiden w'i maxa, gaawallen w'i maxa kanbo tanmi do fillo w'a yi. Barayen wunon do a doroken ya n'i ya. I wa diinan yinmen ɗa tandume wujune, komen ya n'i ya.

« An xa toxo ? » A ti, ike ya toxon ni Baafin Danbele. I na do Siixu Umoru Fuutanken ya yi. A wa bakka Fuuta Dingiraye. A da ta ɗeru ɗa hijun ɗa kinbakka. Jahadun w'a maxa. « *Alla taji balde keeferun* » w'a maxa. Kame sogonen wuno w'i ya, dunɗaru sikki w'i yinkollan ɗa. A da Alla ɗaaga i da, i da Arijana hooxo yaxarun wari n'i toxo duna di. I wa kome mundunu ke be ga xoyi i moxo. I do a ga wa kalla do me yi, i do a ga wa telle do me yi Laahara.

Baane su d'i safayun bagandi n'i saxundi, n'i kitten saxu i kappallenman kunken ɗa. Diinan toxo sooxono, i wa regene. Komo ku filli ga toxo regene, baane su d'i kitten do labon bagandi, n'a doppa baanen gijinmen ɗa, n'i kitten do labon yanqandi. Komo ku filli xeere nan daga xenu. Maasinankon da Yaranga Taamura wutu. Fuutankon da Baafin Danbele wutu.

Siixu Umoru Fuutanken taaxu. A ti Fuutankon da :  
« Tinne ! Xa da Alla raga, axa nan tawuhiidi. Yugo su ga sin kanma marafan ga w'an maxa, an na yitti xoore muuru, an nan daga sigi a falle. Axa nan maxa marafa katu Maasinankon ɗa de ! Axa n'a katu i siinun ya. Ke be sin ga na xenu bakka a wure baane, a yinme wa saqa, axa ga w'a karini. Nxa, axa ga na marafan katu i yinmenu ya mexe nt'i roono. »

Fuutankon ga na marafan soli, i n'a tukka si yugon ɗa, n'a taanun naxati katu bakka a wure, a na xenu. Maasinanken na yanqa, a n'i xaasan fuutu bakka xirixen di, a n'a boyi nan saxu. An ga na ri n'a tirindi, a na ti : Eh ! Ike taaxunten ni si yugon ya kanma, taanu naxati ya n'a yi. A ra wa wurunu. A wuru a ma kisi kallen ɗa. Ike nta wurunu i g'i toxon bonondini. Yanqa, ke be g'i karini i n'a ko an da. An nan daga giden wutu, an n'i yinmen kara. Ken ga fe mexe ra nt'i karini. »

Fuuta ga digi Maasina yi, Maasina maabun giri nan sigi. I ti : « Siixu Amadu Hanmallabo ! An ya faaban giri yere nan daga kinbakkani di ta peru. Nan daga Tunka Kallanɗunten ɗaaga fo yi, ke be me ga nt'a yinme maxa. A d'anken kini a yi. An ri yere wolin ya n'an ɗa. Xason do saanen marikanten w'an gijinmen kanma, Maasina su taaxu t'an ɗa. Siixu Umoru Fuutanken faayi Maasina bonondini. Daliilu ke be ga w'an maxa, an na Alla ɗaaga kanmen nan ri, Fuuta bunan nan safi. »

Amadu da Alla ɗaaga, kanmen ri. Fuuta bunan safi. Maasinankon da gaawallen wutu. I toxo Fuutanken sufana i w'a buxutini. Kanmen da niijen safindi. An do si yugon wurunte, deerun w'an ragana. Seriforen do jin toxo wurunu niijen kanma. Sallifanan ga kijene donpi yigun korobinsen da niijen juri. Xoben saage donxono. Sigumu filli wa telle takki me yi nan xenu, baane nta baane walla. Laxasaran ga wa kijene, Elimaane Sire Sanba Denba Haluwaara, a da koroosen saxundi. A d'i kittun filli wutu kanmun ɗa na Lajimu Kaman ɗaaga ti alfatiya binnan ɗa.

Kanmun raqen wuji, malikiyan yanqa. An wa haadamarenmen walla saqa, foren ga bakka do a raqen do a nuxunen ɗa, mexe raqe nt'a yi. I da Maasina bonondi. A daga taaxu, a ti Fuutankon nan ri. Wujunu ku tanmi do fillon taaxuranun sikki, tanjikke do wujunu tunmi xarabe, i ga laxasaran sallini, soro tanmi do ɗeru ya na do a batten ɗa. A su jeme. Soro ku tanmi do ɗerun t'a da : « Siixu, o n maxa wuyi ! Maasina jiiɗen ɗa. »

I ga da laxasaran salli, i toxo taaxunu. A koota, ji ntaxa, fo wo fo nta. I ga wa tini i wa gilli, i do ɗogongumen yogo gemu. I d'a tirindi : « An giri minna ? » A ti : « Degenbere. » I ti : « Degenbere na minna ? » A ti : « Axa yaaxen ga wa gide ke be yi. » I ti : « An giri no kan bire ? » A ti i ga da suxuban salli. I ti : « An kira minna ? » A ti i ma kira noqu. I ti : « An yanqa minna ? » A ti i ma yanqa noqu.

I ti : « Eh ! O ra nta dagana wuyi non ɗa. ɗogomen kiye terende gelli suxuban salle ma saasa, o ra nta dagana. » Siixu Umoru Fuutanken ti : « Xa taaxu. » I taaxu. Soro ku tanmi do ɗeru, baane su n'i kitti tayen saxu baanen kunken ɗa. An n'an kitti noogen bifindi an yaaxon ɗa. A da koroosen raga. Kamen ga tinmene bire be, a ri i yerendi gide ke kanma. A ga giri nan sigi giden kanma, a ti : « Yere ya ni Degenbere yi ba ? » I ti : « Yabo. » A ti, sere nta Alla tuunu (*Alla andataaki*). Ike ga da jahadun muuru kinbakkan ɗa koota be, Lajimu Kaman d'a kini n'a wutu Degenbere ya katta Degenbere. I d'a sinma, n'a wutu Fuuta Degenbere yi ya ni, nan daga a taaxu Degenbere be ga Alla faaren Mediina kaaran ɗa ken ya ni. I m'a tu nan ti Degenbere

tana wa yere. I ntax'a tu Degenbere be ga ni. I xa nta Alla namariyen sooxini.

A ti soron tanmi do jerun da: « Xa da kunme muuru, axa nan ro. Sere be ga n'axa muuru a na waase axa walla. » A da Xaado yaxaren xiri, jin w'a maxa, a da sallijin katu. A da jonbanguman bagandi, a da Alla faaren yinmen yintun bagandi, a da xoodan bagandi, a d'i koroosun bagandi, a d'i kini yaxaren ŋa. A ti : « An na tigitu ku ya. I renmen wa riini yere, a toxon ya ni Tijaani, an d'a ŋi sefene a jigijippi ya. An na ku kini a yi. A nd'an tirindi, an na ti i ro ke gidinkunme di. »

A ti soron tanmi do jerun da : « Axa nda ro, gelli sere baane ga na bagu bakka axa yi, axa na bagu non ŋa nan daga ro noqu tana. »

I ro, i taaxu nan dalla. Jogoranme be ga w'i di, a furunfunti bakka. A ti ike wa dagana sinmen muuru. I ti : « Eh ! An na sinmen kitana minna ? » Iyo, a ti i wa dagana, m'i wa hari tafedari kaawante ken kitana n'a ri i raqen ŋa. A ga bagu, a do Maasinankon ri gemu killen ŋa. I dira a kanma n'a raga. A ti : « Xa maxa in kari. Xa da sinmen kini in ŋa, n na Fuutankon noqu koyi axa yi. » I da sinmen kini a yi. A ga d'a mini, a ware i kaane. I toxo dagana. Saado a ga wa riini, Fuutankon bagu nan ro noqu tana. « Ayiwa ! », a ti : « I na yere ya. » I ti : « O na ku kitana kan moxo? » A ti : « Xa daga suwa, o na sokken riiti, o na yinbe ro a yi. » I daga suwan do sokken riiti. I da yinben ro giden ŋa m'a ga wa fentini, nxa sere nta no.

Futuron ga wa kijene, Tijaani Amadu Tijaani ri. A taaxunten wa jeyidaane kanma. A wa direne do giden kanma Banjagara yi. A wa du da : « Eh ba ! Ba yo ! Eh ba ! » Ma Xaado yaxaren ga w'a walla. A da gidinkunmen noomi a yi, a ti : « An faaba ro yere ya. » Tijaani sigi non ya yi, n'a gangu. Yogonu na ti a da a jumi ta baane. Yogonu na ti i sefe. » A ti xaado yaxaren da : « A ro yere ya? » A ti : « Yabo. » A ti : « A da manne toxo an maxa? » Yaxaren d'i bagandi a d'i kini a yi. A ti : « An na daga taaxu Banjagara. Makki wa Fuuta, Madaani wa Kupakaari, Muntaxa wa Nooro, Amadu wa Seegu, Daaye wa Jaala, anken nan daga taaxu Banjagara. »

A daga taaxu Banjagara na tagayen taga. A da Gurudanmun do Xaadonun muuru, wujunu tanmi do fillo xarabe. A kiinayi. Baawon katundi, Maasina fanjen ro. Fanjen ken xa ga na ro Maasina, sin su wa dagana saheli ya. A da fuurun xobo, nan ri Maasina jiijen di xasu tunmi. Yugo be saareyen ga xaaxu jeri, a n'an wara, yaxare be noxon ga kije xasu jeri, a n'an wara. Ku ga fe, yugon do yaxare, Maasina, a d'a su xannen kutu.

Kiinayen ga bagu, Maasina sokken ga kaawa, a da kuren girindi, i da yinben rondi gelli Banjagara a ma kara ma Xudaccu. I ga d'a tirindi, a ti i d'i faaba tanbon ya tuga.

Ken ya ni in maarenme, i be ga na ti ke duna, a na ti hayi an ja sa ke leminaane. Baawo Alla demu na Mahamadu Abudalayi Suwaadu kawandi. N'a rondi konpen di, raqe nta konpe ke yi. Yelijen wa kappa a yi ken konpo baane noxon ja, a d'a xata m'a ga wa tanpini. A konto a ragana. A ga

tanpi, a daga taaxu. A ti yelinen da : « Anken ni manne yellin danbe yi? » Yelinen ti ike ni duna ya. Kame siine do koota baane su ya nan baana.

Ku d'i kiyen ja nan daga saxu. Jinnanun fe, malikiyanun fe, hadamarenmun ya ni. An gollu ku ya ni tanni, o ga w'i masalana. Hooren ga n'i du do ke be sinma, an jaana ken ya yi.

### **Karunga Jaawara do Fuuta Diina**

Siixu Umoru Fuutanken ga ri Fuuta Tooro, a d'i jaaga jahadun ja, i bara. A d'i jaaga ta fillande, i bara. A ga d'i jaaga ta sikkande, i ti : « O wa dagana me wari. » Fuutankon daga me wari. Jaaxa i ga da me ji noqu be, Siixu Umoru daga du yilla jabangurudan ja, a kira i terinkana. I da girifen jongi a yi, i m'a tu. I ga duguta mewallen ja, i ri kaanun ja, nan daga katta Siixu Umoru Fuutanken ja. I ti : « Siixu ! » A ti : « N naamu. » I ti : « An ga d'o jaaga jahadun ja, muruxunten wa Fuuta gelli an ra ga Alla jaagana o d'a ga wa dagana. O na daga an deema jahadun ja. » A ti i ra nt'a yi. N'a wutu yere nan daga a wara Makka, nan dangi Makka nan daga a wara kinbakkann ja, duna noxo ke daroyen ni kamo karagi siine terende ya yi. An ga daga noqu su yi, an wa ken muruxunte jiini no. Ike ra nt'a terendini. I ti : « Yaala o ga wa do ke be an wa tu ya ba ? » A ti i w'a tu. « Axa na do Fuuta kollangan ya. Ken ra nta dagana. »



Nxa soro beenu ga na daga do diinan ɗa, Alla wa baraken roono kun di. I beenu ga na toxo yere, axa ga toxo yere do soxen ya, hari na baraken ro soxen ɗa. Nxa, a ma ti hari na baraken ro i kamanu do i kitawun ɗa de ! I soxono ya abada, mukke nda yanqa i ya, i ga w'an dorono ti yigandi sire be, ken ni larun ya.

Siixu Umore Fuutanken daga jahadun wutu Dingiraye. A ri Tanbabugari raqen raga Tanbawura. Tanbakunda fe de ! A d'a yokken bagandi. A ri Garan Masa raqen raga Kunakaari. A d'a yokken bagandi. A ri Naxalengaran ɗa Yelimaane, a d'a yokken bagandi. A ri yanqa Nooro Xoore. Juumu Kaban wa no, Alla dugulen toxon w'a maxa. A d'a ɗaaga, Juumu Kaban da safayinlenmu tanmi do fillo dabari n'i kini a yi, na alifaatiya wutu a da. Siixu ti i d'a tu. Alla da ren yugu tanmi do fillo ya laayidun wutu i da. An ga da safeye su safa, renme ya toxon n'a yi. I nta do ken ɗa. Allanaagegiden w'an maxa, an n'a kini i ya, i n'i tejen taaxu a yi ta sikko.

A da giden bagandi, a d'a kini Siixu Umore Fuutanken ɗa. A d'i tejen taaxu a yi. A taaxu Nooro na tagayen taga. A da Nooro Jaawara ɗaaga, i tuubi. A da Kagorota ɗaaga, i tuubi. A da fullun ɗaaga, i tuubi. I da diinan senbendi Nooro, juman tage.

A da gangon gangu, sere su kiye terende ra ga wa juman tagana an da, an ga wa riini sallifanan gemundi, an nan ri juman salli.

Ken koota, jinna yugu xase Sinqe Silemaanu, a wa saqa Jegibe. Sere kari kinnan w'a maxa, tagantaanen w'a maxa, mariton w'a maxa, jonoko funsun sikki w'a maxa, fatangadan w'a maxa. A nda ro gunnen ɗa, a wa wandi faaba karini. Tenen Jara w'a maxa, jinna yaxaren ya ni. Konbotabaanen ga wa sikki a gijinmen ɗa. A taaxunten wa jiba xurungun binnan kanma. Kuren w'a maxa, a ga na ɗi riini salli Nooro, wujune do kamo karagi xarabe wa do a batten ɗa. I na ri salli. Sallifanan ga na salli, i na saage. Fullun na ti a da « Karunga Ceddo ». A da ta fillo ɗa. Ta sikkande, a da Fuutankon tirindi Ceddo wure ya. I ti Ceddo na xoyi sere be ga ma tuubi ya. A ti : « Siixu ! » Siixu ti : « N naamu. » A ti : « An nan sefe Fuutankon da. Ike feti Ceddo yi de ! » Fuutankon ti : « Anken ni mani ya ? » A ti ike ni Jaawaranken ya. I ti yaala Nooro yere Jaawaran digaame duran w'a di ba ? A ti a w'a di. « Iyo, » i ti : « O w'a mulla an na Jaawaran digaamen ko, o n'a mugu. » A d'i kitten doppa tagayen ɗa, wujune ke do kamon karagi marafa, i da kattan taxundi. Bunan tiiden d'a finandi. A ti : « Ke ya ni Jaawaran sefen ɗa. »

A do wujune ke do kamon karagi xaraben saage, a da Jabbige muuru. Juma fillanden ri, i ma ri salli. Juma sikkanden ri, i ma ri salli. Siixu da faaren xayɗi a yi. Eh !, a ti, ike bara ya mene. Kingi jaarun giri nan sigi. I ti : « Axa n'a tu de ! » Karunga ti i bara, Sirakoro bara, Menebiidu bara, Turungunbe bara, Jaara bara, Xudaccu bara.

Siixu taaxu. Jumaanun sikki ga tinme bire be, a da salaatulufaatiyan raga, Alla dugulen toxon ya ni. Jinnanun

giri Nooro wuron kaananan ŋa, nan daga Karunga siiti Jabbige, nan ri a do kaccun saxundi Siixu Umoru Fuutanken wure Nooro. A d'i kitten saxu a kanma. A ti : « Karunga ! » A ti : « N naamu. » A ti : « An wa yere tu ba ? » A ti i w'a tu. Siixu da kaafan bagandi, nan ti Karunga : « Juma riye an wa riini salli ba m'an nta riini ? » A ti i nta riini. « Iyo ! », a ti : « An ga nta riini, n w'a karini. » Karunga ti : « Ke labo be ga w'an maxa ba ? » A ti : « Yabo. » A ti, ke ra nt'ike Karunga karini. Baawo ke gan katti ike karini, i nta tini i da Birante Karunga. Birante da yugu karagi ya saara mene. Ike nan xasa fillon ŋa, fillon nan xasa ike yi. Jinnan ya n'an maxa a d'in riiti. Jinnan w'in xa maxa, a ra w'in denne Jabbige. Yaxanbaane ke saxunte, a da Tenen Jara gangu. Jinna yaxare ke d'i kitten fuutu gelli Jabbige, na Karunga do kaccun wutu Nooro, nan daga saxundi geden di Jabbige.

Ken koota, geden jaabanten w'a maxa tandume sogone. A nda ŋaaxama, a wa yanqana geden di. I na giden bifindi a raqen ŋa. An ga na Alla ŋaaga, an nt'a walla. Yillen ga na kare, a na bagu. Siixu da kuren girindi Nooro, i ri Jabbige raqen raga. A ti wujunu tanmi do fillo na deben kinxennan raga, wujunu tanmi do fillo na saahelin raga, wujunu tanmi do fillo na fankitten raga, i na kinbakkan wara Karunga kaane de ! A na bagu. I toxo bunan katta.

Beeteyen ga kije, yaxanbaane ke da kuren bagandi. Wujune ke do kamon karagi donpi yugo, jiba xurungun binne, dafan binne, bongu, ceero, caaju, dafe be korobinsen xullen ga ni, a nt'a yi. Si yugo su g'a di, yaxanbaane w'a kanma, latagiirin w'an maxa, raqu filli w'a

yi, bunan do mexen w'an maxa, wolonŋen wunon do a doroken w'an ŋa. Muxutuumi xooren baratinten w'an jon ŋa. Yaxanbaane ke yinme kurufi xooren w'a yinkollan ŋa. Fatangadan w'a maxa. A wuyin wa tanjere do xaaxu sikki. A taaxunten wa si yugon kanma, a wuyun wa tanpille do xaaxu sikki. Salli fanan ga wa kijene, a d'i saagandi.

Ken falle yaxanbaane giri nan daga katta Siixu yi. A ti : « Elimaane Sire Sanba Denba Haluwara, n w'a mulla an na duwaawu kini in ŋa, n nan daga Karunga raga. » A ti : « An yaaxe nta Karunga yi ba ? » A ti : « N yaaxen w'a yi. » A ti : « A nta ragene kundu. Ke be ga w'a ragana ken ni Alla toxon ya. Marafa ra nt'a ragana, kitte ra nt'a ragana, fatangada ra nt'a ragana, mexe ra nt'a ragana. » A saage Siixu jaagana, m'a ga wa tinmene ta sikko di. Ayiwa, a ti : « Daga, ike m'an jaamari an ga w'a ragana. An ga n'a raga a nan linji in da. An ga na konto a yi xa, i nt'an langana. »

A da killen wutu m'a ga wa dagana jaatari yaxanbaane ke kaane. Latagiiri ke be ga w'a maxa, a d'a tukka a yi na kattan taxundi. Karunga m'a faayi. I toxo dagana. A saage dagana sigi a kaane ta fillandin ŋa. A da xaraja ke tukka a yi na kattan taxundi. Karunga m'a faayi. Ta sikkandin ŋa, a ri a yi sikki du kaane gidinnuxunnen ŋa. Karunga do si yugon daga jaatari a kaane. A ti a da : « Kaawu, an na manne muurunu ? » A ti : « N na do an ya yi, n ga w'an ragana. » « Eh ! », a ti : « Nke ni Birante Karunga ya yi wo. » A ti : « N w'a tu wallahi, n w'a tu. N na do an ŋa in ga w'an ragana ya. »

« Eyiwa ! », a ti : « An moxo sirondi. » Karunga d'i yaqen taaxundi gidinnuxunnen ŋa. A d'i kitten ro sikkaaran di, na fatangadan bagandi. A d'a dabari ti tanpille do yanxabaanu karagi ya yi moodin ne. I d'a saxundi xaariten di siine xasu tanmi do fillo. Haadamarenmen foren wa kappa a yi, kateyen wa kappa a yi, tuurukanben wa kappa a yi, kanjen wa kappa a yi, yaxarin xooren salli jin wa kappa a yi. A ga n'an sanpa an yinkollan ŋa, koosinden w'a wuttu gelli an tandegeren ŋa, a ga na ni kijene an xorin fuulan ŋa, ken bire an neenen bagu an fuŋu sogone. A toxo a xatana, a toxo a xatana, i ga wa riini Fuuta diinan ŋa, a da si yugo ke ŋa, a d'a kobi. A daga jaatari a kanma, n'a sanpa i yinkollan ŋa, a neenen toxo yarayalla. Siixu ti : « N da ke ya ko an da. An nta Karunga tu. »

Siixu do kuren giri Nooro, i ga ri Jinnamaxanbugu, a ti : « Yere xa toxo ? » I ti : « Yere ya toxon ni Jinnamaxanbugu. » I dangi. I ri Sirakoro, i dangi. I ri Turungunbe, i dangi. I ri Meenemeeno, a da katta baane katu Fuuta yi, a da yinben ro deben ŋa. Siixu ti : « Yere xa toxo? » I ti : « Meenemeeno. » A ti, *Meenemeeno* : « *Mawuna ta Meenemeeno fusa ta* (Debe ke nta karene a ntaxa xoorono). » Siixu Umoru Fuutanken ga dangi na kaanu beenu ni no, kun kaanu ya na no. Fo nta kappa i ya, fo nta bakka i ya. I ri Basaaxa. A da katta baane katu, i dangi nan ri Nsanna. Elimane Sire Sanba Denba Alimuxutaari Haluwara, i da guppunxullen sigindi, a taaxu.

Ken koota Baafin Danbele wa do a batten ɗa. Diinan darappon n'a ya maxa. Kame sogone wuno w'a yi, duɗaru sikki w'a yinkollan ɗa, tanjikke yidanxare segunten w'a maxa, n'i boto, kaccun w'a yi, i wa siitini a xoodon ɗa. A ga na ro jahadun di, a wa yidanxare wuttu i tayen di, a wa yidanxare wuttu i noogen di. Dunxanɗun do fulun wa do a batten ɗa. Ganbarigumun wa do a batten ɗa, a wa poyi regene.

Moodin ro xiliwan ɗa xaso do bito tanmi. Diina be ga wa do Karunga batten ɗa, i sanqi.

A da Alla ɗaaga, na Karunga yaqen kita. A da kanɗen caakan bagandi, n'a kuni Jogoranmen ɗa, a nan daga a kuni Karunga yaqen ɗa. A tere m'a ga wa riini a ɗi wanɗindilanben ɗa. A da kancaakan wutu n'a kuni a yi, nan ti : « Siixu ti i nta do Karunga yi de ! Baawo a ma fo ɗa i ya. I na do an ya yi. I ga n'an yaxi, i wa kanɗen xaraxan tagana an da, n'an saxundi a yi. I wa dagana an taaxundi Seegu. »

A ti : « Xa daga taaxu. Doroke wa Karunga maxa, kame do safayillen baane ya n'a yi. A nta wanɗini. I ga n'a neene na doroke ke kita a yi koota su, i wa faaren walla axa yi. Axa na ri a ɗi wanɗindilanben ɗa, axa n'a raga. »

A toxo yaxanbaane ke neenene. I nda saxu wuron di, a nda kati a yi, a na dire bakka a wure. A nda ti a da manne? A na ti : « Ayi, nke ra ntaxa tintono an ɗa mene. O gille Jabbiga xasu manime ? Xasu ɗeri. Doroke ke be ga w'an xannen ɗa, an do a wa sere karini. Seriforen ya n'a yi. O ga na saxu, timen wa xoyi n'in kari. An na doroke ke ya

bagandini in na daga a wanqi. A nda xura bire be, ken bire o na saxu. »

A d'a neene n'a bagu a yi. A ga daga wanqindilanben ɗa, a da faaren xayɪ Siixu Umoru Fuutanken ɗa. I da killen wutu, m'i ga wa riini yaxanbaane ke taaxunten ɗa, kurufu xoore ke w'a yinkollan ɗa, latagiirin wa saɗa a taanun kanma, korofan w'a yi, si yugo ke wa yetini. I ga da salaamaleyikumun ɗa, a ga da kurufen bagu i yinmen ɗa, a d'i yinmen wutu na tannaxate ke yaxanbaanen faayi, sere baane yan toxo sin kanma. Tanjikke ke do kabun su kanu nan yere. Ke be ga toxo sin kanma, a toxo malini garabuusin ɗa. Sin ga na guruda kita, a wa warene a di, a nda badage kita, a wa warene a di, m'i ga wa riini Siixu taaxunten ɗa. Siixu ti a da : « Mannen ɗa ? » A ti : « O daga na Karunga ɗi taaxunu. O d'a kuɗni, a d'o ɗimi. A ga d'i yinmen wutu n'o faayi, tanjike ke do kabun kanu nan yere. Ike baane ya ma yere. » Siixu ti : « An xa ma ri moxo yi mene. » Ku beenu ga yere, Karunga ti i da : « Xa giri, axa n daga katta Siixu yi. A n ri, i wa kalla lenki. Nxa, saado i ga wa kalla, digaame be ga w'i maxa, i n'a ko a da. »

Siixu ri. A ti a n'i yaɗe ke xiri. Sigumen daga a wutu lanben ɗa. I ga ri a yanqandi, a toxo direne. A w'i du da : « Bisimillayi, n kiina da manne ɗa axa yi ? Axa ri manne muuru o kan di ? Axa da manne neqaati tunki o yi ? Axa tanbon ya n'o yi ba ? » « Eh ! », Karunga ti : « Sabari. » A ti : « Xa d'in yaɗe ke tirindi, gelli in ga d'a yaxi koota be, yaala a da xatti yiga torun tunmi xattin ga fe ba? » Yaxare ke ti :

« Ayi. » A ti : « Gelli in ga d'an yaxi, an tere an ta yi ba ? »  
A ti : « Ayi. » A ti : « Gelli in ga d'an yaxi, n d'an katu ba ? »  
A ti : « Ayi. »

Iyo ! A ti i wa kalla. An ga d'a wari fulaanen ga d'ike kita an ya d'a ja. A ti Siixu Umoru Fuutanken da, i wa kalla. Baawo i ga na tuubi lenki, i wa tini i kanu kallen ya. Nxa, i w'an jaagana, katta baane ke be ga w'i marafa ke yi, i n'a katu i si ke yi sere nan maxa setu a yi. »

A da katta baane ke taxundi. Si yugo ke xeere nan daga xenu. Siixu ti i na yaxare ke fina saxundi i n'a xurusi. Karunga n'a wari, diminna na bagu a butten ja. Baawo n'a wutu Jabbige nan ri a wara yere, ike ga konto yugo be yi, i ga ri a raga kundu, yaxaren ya d'a ja. I da yaxare ke saxundi, n'a xurusi. I ri Karunga saxundi n'a xurusi. Yaxanbaane ke wa saqa Nsanna.



---

## *Kitaaben nuxudufoonu*

Roraqe	3
<b>Siixu Umoru Fuutanken Xiisa</b>	<b>4</b>
Fuuta do Maasina	4
Karunga Jaawara do Fuuta Diina	22